



Bijele rode u Cvilinskom polju

Na oranicama Cvilinskog polja, pored Drine, 9. oktobra Nove godine pojavilo se pet bijelih roda. Toga dana sam, obilazeći neke arheološke lokalitete s ekipom TVBiH, i sam bio iznenađen njihovom pojavom s obzirom na to da nije poznato da su ikada ranije boravile ovdje. Traktorist koji je pripremao zemlju za jesenju sjetvu reče mi kako ga odjutros prate skupljajući puževe, crve i druge životinje iz brazda i kako nimalo nisu plašljive. Kod lokalnog stanovništva pojava roda izazvala je znatiželju i zanimanje odakle rode sada kada ih nikada nisu vidjeli u Cvilinskom polju ni u širem području Podrinja.

Odgovor na pitanje odakle rode na ovom području je jednostavan: vraćajući se iz svojih ljetnih prebivališta, iz sjevernih područja Evrope, a možda i s obala Save u BiH, na putu za Afriku, ovdje su zbog nekih razloga prekinule svoj daleki put.

Obilazeći svakodnevno Cvilinsko polje, zapazio sam da su vrlo aktivne i da se premještaju, prateći orače i skupljajući hranu. Zapazio sam također da jato čine četiri odrasle i jedna mlada ptica. Pretpostavio sam da će se rode ovdje zadržati nekoliko dana, ali su one tamo već 20 dana (tamo sam bio do 28. oktobra) i mislim da su još tamo. Bojim se da su u svom pohodu ka Africi već zakasnile.

Pratit ćemo šta će se dalje dešavati s ovim zanimljivim pticama.

A. S.